

CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL

Organismo SECRETARÍA XERAL DE UNIVERSIDADES

Capítulo	
Epígrafe (Para inserir no <i>Diario Oficial de Galicia</i>)	

SUMARIO:

ORDE do XXX de 2025 pola que se establecen as bases reguladoras para a concesión, en réxime de concorrencia competitiva, das axudas para a consolidación e estruturación de unidades de investigación competitivas e outras accións de fomento nas universidades públicas do Sistema universitario de Galicia, nos organismos públicos de investigación de Galicia e noutras entidades do Sistema galego de I+D+i e se procede á súa convocatoria para o exercicio 2026 (código de procedementos ED431C, IN607A, ED431B, IN607B, ED431F e IN607D).

TEXTO

Desde hai anos, a Xunta de Galicia financia parte da I+D+i do tecido investigador da Comunidade Autónoma, en particular nas universidades públicas do Sistema universitario de Galicia, nos organismos públicos de investigación de Galicia e noutras entidades do Sistema galego de I+D+i enfocado nun modelo de axudas de carácter basal e estrutural vinculadas á actividade investigadora dos grupos de investigación máis competitivos do sistema e non adscritas a proxectos de investigación concretos.

O Consello da Xunta de Galicia, o 8 de abril de 2022, adoptou o acordo mediante o cal se aprobou a Estratexia de especialización intelixente (RIS3) de Galicia 2021-2027, que define o marco para as políticas de investigación e innovación na Comunidade Autónoma para este período. Como instrumento de planificación operativa para a súa implementación entre 2025 e 2027, o Consello da Xunta aprobou o 3 de febreiro de 2025 o Plan galego de investigación e innovación 2025-2027.

A RIS3, no período 2021-2027, aborda a través da I+D+i tres grandes retos da economía e a sociedade galega. Para darlles resposta, por unha banda, a estratexia orienta as capacidades e esforzos de investigación e innovación en Galicia cara a tres prioridades temáticas transversais e,



pola outra, reforza e impulsa o ecosistema galego de innovación a través de 5 obxectivos estratéxicos.

Os instrumentos, apoios e actuacións que se desenvolven no marco da RIS3 en relación con cada obxectivo estratéxico recóllense nos correspondentes programas. Estes instrumentos poden dirixirse a prioridades e ámbitos de priorización concretos, debido á existencia de características ou necesidades diferenciadas dos axentes, cadeas de valor e mercados relacionados con cada un deles, pero tamén poden ser horizontais en relación cos retos e prioridades. O obxectivo estratéxico 1 busca consolidar unha oferta de investigación e innovación avanzada, integrada, ordenada e aliñada coa especialización de Galicia. Un desafío concreto relacionado con este obxectivo é o de incrementar a investigación e as súas sinerxías, fortalecendo os recursos para unha investigación de calidade e impacto, así como a súa orientación ao mercado.

En consecuencia, a presente convocatoria enmárcase na RIS3, *de Galicia 2021-2027*, respondendo aos tres retos e ás tres prioridades. Así mesmo, contribúe ao obxectivo estratéxico 1, integrándose, polo tanto, no programa Integra da RIS3 de Galicia e no programa Coñecemento do Plan galego de investigación e innovación 2025-2027.

Neste contexto, os diferentes plans galegos de investigación veñen recoñecendo que en Galicia existe unha serie de grupos de investigación, denominados grupos de referencia competitiva, caracterizados por bos índices de publicacións científicas; un nivel de captación de recursos elevado, aínda que variable, segundo a área en que traballen; competitivos a nivel estatal e, en moitos, casos internacional; con capacidade para formar e atraer mozos e mozas investigadores e habituados á cooperación con outros grupos de investigación, con institucións ou con empresas. Doutra banda, están os grupos con potencial de crecemento que, sen alcanzar os niveis de desenvolvemento dos anteriores, teñen calidade investigadora, constatable con criterios estritos, e que están na senda que os leve a ser grupos de referencia.

Estes grupos deben dispor dun financiamento estrutural e continuado, condicionado a criterios de calidade, que garanta un mínimo basal que lles permita desenvolver as súas liñas de traballo de xeito estable e cunha liberdade de acción suficiente para reorientar o seu labor, de ser o caso. Este financiamento debe outorgarse sobre a base de mecanismos de avaliación rigorosos, tanto das propostas presentadas como dos resultados que cada grupo acade ao remate da axuda. O instrumento que permite canalizar o financiamento preciso é o Programa de consolidación e estruturación de unidades de investigación competitivas que, anualmente, vén convocando liñas de axuda nesta materia en réxime de concorrència competitiva.



As vantaxes do financiamento estrutural quedaron patentes e de manifesto desde o inicio da pandemia da Covid 19, dado que o feito de que as axudas que se convocan sexan un financiamento de estruturas, e non de proxectos, permite a suficiente flexibilidade para que, en calquera momento, os grupos reorienten a súa actividade cara a novas áreas de interese ou a novas modalidades de traballo, sen ter que estar suxeitos a proxectos determinados.

Cómpre considerar que as convocatorias de financiamento de grupos de investigación se veñen realizando de xeito ininterrompido desde hai varios anos mantendo, en esencia, as súas características básicas, o que contribuíu a crear un sistema de I+D+i estable e estruturado. De feito, a longa traxectoria do programa está a producir unha evolución no sistema de grupos concordante cos obxectivos fixados nos diferentes instrumentos de formulación estratéxica da I+D+i autonómica. Os grupos están cada vez máis estruturados e cohesiónados e a súa dimensión, en termos de número de investigadores/as, e a súa capacidade de captación de recursos competitivos, son cada vez maiores. Así, logo da convocatoria do ano 2025 alcanzouse o maior número de grupos con financiamento activo desde o inicio do programa observando, ademais, que o incremento é especialmente significativo nos grupos de referencia competitiva, que son os que teñen unha capacidade tractora máis importante.

Boa parte deste éxito é consecuencia da estabilidade e continuidade no tempo da convocatoria, que asegura ao sistema un marco sostido que é unha das condicións básicas capitais para calquera sistema de ciencia. Por ese motivo non é aconsellable introducir cambios notables dunha a outra convocatoria sen realizar os estudos previos necesarios para garantir a mellor consecución dos fins previstos. Esta convocatoria mantén maioritariamente as liñas e criterios da anterior así como a simplificación da documentación a presentar para os grupos de referencia competitiva con traxectoria consolidada.

A convocatoria quere contribuír a garantir a igualdade real entre mulleres e homes no ámbito universitario e da investigación, en cumprimento do disposto na Lei 7/2023, de 30 de novembro, para a igualdade efectiva de mulleres e homes de Galicia. Por iso, nas axudas que se regulan nesta convocatoria valoraranse positivamente aquelas propostas de grupos liderados por mulleres, integrados en máis do 40 % por investigadoras ou a incorporación da perspectiva de xénero no seu quefacer diario.

Complementariamente, as propostas deberán incorporar para a súa valoración as políticas que os grupos desenvolven en materia de Investigación e innovación responsable (RRI) de acordo cos estándares internacionais que definen estas prácticas.



Por último, o sistema debe atender as diferentes realidades de investigadores e investigadoras individuais que, contando cunha traxectoria excelente, teñen que afianzar unha liña de traballo baseada en proxectos de alto impacto fundamentalmente nos ámbitos nacional e internacional. Para este fin nesta convocatoria mantense esta liña de apoio cuxo baremo está en concordancia co expresado nos parágrafos anteriores e na liña de atender máis á viabilidade e sinerxías que se establezan desde o proxecto e ás capacidades do equipo que sobre os méritos que as persoas que o integran teñan acadado ao longo da súa traxectoria investigadora anterior.

Esta orde introduce como novidades, en primeiro lugar e co obxectivo de continuar co criterio de simplificación do procedemento administrativo, mantense o procedemento simplificado de avaliación, establecido na anterior convocatoria, para o caso das solicitudes das universidades públicas do SUG presentadas para os grupos de investigación de referencia competitiva que teñan demostrado unha traxectoria excelente ao longo do tempo que virá determinada pola obtención dunha cualificación A na avaliación final en anteriores convocatorias.

En segundo lugar e co mesmo obxectivo do punto anterior mantense a eliminación da avaliación parcial, prevista nas convocatorias anteriores á do ano 2025, para os grupos de referencia competitiva (GRC) e os grupos con potencial de crecemento (GPC).

En terceiro lugar, no caso das universidades públicas do SUG, e coa fin de promover o fortalecemento dos grupos de investigación do sistema de I+D+i, para o caso de grupos novos que se creen por fusión ou absorción doutros grupos que contaran con esta axuda activa no ano 2025 amplíase o prazo de rexistro na universidade de tal xeito que o novo grupo deberá constar inscrito como tal nos rexistros da súa entidade antes do 31 de decembro de 2025.

Atendendo a estas consideracións xerais e en virtude das súas competencias, a Consellería de Educación, Ciencia, Universidades e Formación Profesional establece as bases para o Programa de consolidación e estruturación de unidades de investigación nas modalidades de grupos de referencia competitiva, grupos con potencial de crecemento e proxectos de persoal investigador con traxectoria excelente, e convoca estas axudas para o exercicio 2026.

En consecuencia, e no uso das atribucións que teño conferidas,

ACORDO:

Artigo 1. *Obxecto*



Esta orde establece as condicións, en réxime de publicidade, obxectividade e concorrència competitiva, para o acceso ás axudas para consolidar, estruturar e especializar as unidades de investigación máis competitivas do Sistema galego de I+D+i mediante as seguintes modalidades:

- Modalidade A: grupos de referencia competitiva, procedementos ED431C e IN607A (as condicións particulares detállanse no anexo I).
- Modalidade B: grupos con potencial de crecemento, procedementos ED431B e IN607B (as condicións particulares detállanse no anexo II).
- Modalidade C: proxectos de persoal investigador con traxectoria excelente, procedementos ED431F e IN607D (as condicións detállanse no anexo III)

Artigo 2. *Definicións*

Para os efectos desta convocatoria terá a consideración de:

a) Coordinador/a: aquel persoal investigador cualificado que asina a solicitude asumindo a coordinación das actividades do grupo obxecto da axuda durante a súa execución. Unicamente poderán ostentar a condición de coordinador/a, os/as investigadores/as, que se sinalan na letra b) deste artigo.

b) Investigador/a.

1) No caso das universidades públicas do SUG, aquela persoa que teña título de doutor/a, que forme parte dun grupo de investigación no rexistro da universidade correspondente do SUG e que teña algunha das seguintes categorías profesionais:

— Catedrático/a ou profesor/a titular de universidade ou de escola universitaria. Poderá ostentar a condición de coordinador/a.

— Profesor/a contratado/a doutor/a ou profesor/a axudante doutor/a. Poderá ostentar a condición de coordinador/a.

— Profesor/a asociado/a de ciencias da saúde (PACS).

— Profesor/a doutor/a dos centros adscritos as universidades públicas do SUG.



— Profesor/a emérito/a. Poderá ostentar a condición de coordinador/a.

— Persoal contratado nos Programas Beatriz Galindo, Ramón y Cajal, Juan de la Cierva, posdoutorais da Xunta de Galicia, atracción e retención de talento da Consellería de Educación, Ciencia, Universidades e Formación Profesional da Xunta de Galicia, Oportunius da Xunta de Galicia (persoal investigador baixo a modalidade de investigador/a distinguido/a contratado/a pola Gain ao abeiro do Decreto 64/2016, do 26 de maio, polo que se regula o réxime de contratación pola Axencia Galega de Innovación de persoal investigador baixo a modalidade de investigador/a distinguido/a), Marie Curie (neste último caso, sempre que teña adscrición a unha universidade do SUG durante toda a vixencia da presente convocatoria), Intalent, Programa de captación de talento investigador de excelencia da Uvigo, ou no Programa piloto da Universidade de Santiago de Compostela para a contratación de persoal investigador distinguido. Poderán ostentar a condición de coordinador/a, agás no caso dos programas Juan de la Cierva e Marie Curie.

— Persoal interino, sempre e cando ocupe unha praza das definidas nos parágrafos anteriores.

2) Para as restantes entidades solicitantes, aquela persoa que forme parte dun grupo de investigación recoñecido como tal pola entidade solicitante e que se englobe nalgunha das seguintes categorías:

— Persoal investigador doutor con vinculación funcional, estatutaria ou laboral do grupo A1 ou I á entidade solicitante ou a algunha das entidades que xestionen a súa investigación a través das fundacións sanitarias de Galicia. Poderá ostentar a condición de coordinador/a.

— Profesores/as eméritos/as - investigadores/as *ad honorem*. Poderán ostentar a condición de coordinadores/as.

— Persoal contratado nos Programas Ramón y Cajal, Juan de la Cierva, posdoutorais da Xunta de Galicia, Miguel Servet, Juan Rodés, Sara Borrell ou Marie Curie (neste último caso, sempre que teña adscrición á entidade solicitante durante toda a vixencia da presente convocatoria), na entidade solicitante ou nalgunha das entidades que xestionen a súa investigación a través das fundacións sanitarias de Galicia. Poderá ostentar a condición de coordinador/a, agás no caso dos programas Juan de la Cierva e Marie Curie.

En ningún caso terán consideración de investigadores/as, para os efectos desta convocatoria, os/as profesores/as visitantes, o resto dos/das profesores/as asociados/as, os/as profesores/as



colaboradores, os/as contratados/as con cargo a proxecto e os/as lectores/as, así como aqueloutras categorías que non foran explicitamente recollidas neste artigo.

c) Ingresos de I+D do grupo:

1) Unicamente os correspondentes a proxectos de I+D financiados por convocatorias públicas das administracións estatais, europeas ou doutras fontes, e os correspondentes a contratos e convenios de I+D ou de servizos de innovación, licenzas de patentes, de *software* e variedades vexetais, así como os premios de investigación e as doazóns dedicadas a I+D.

2) Non se terán en conta:

— Os ingresos correspondentes a proxectos de I+D financiados por convocatorias propias das entidades solicitantes financiadas con recursos internos.

— As axudas para infraestruturas.

— As bolsas e axudas a accións de divulgación e produción científica.

— As axudas correspondentes a programas de recursos humanos.

— Os ingresos por ensaios clínicos.

— As axudas procedentes dos programas de consolidación de grupos de referencia competitiva, grupos con potencial de crecemento, proxectos de excelencia, da Xunta de Galicia.

— As axudas de financiamento de centros de investigación dos programas autonómicos.

— As axudas dos programas estatais María de Maeztu e Severo Ochoa.

Artigo 3. *Persoas beneficiarias*

1. Poderán ser beneficiarias das axudas das modalidades A, B e C as entidades sinaladas a continuación e destinaranas aos seus grupos de investigación, incluídos os dos centros adscritos ao SUG, recoñecidos como tales polas distintas entidades, e ao persoal investigador que proceda, que cumpran na data de publicación desta convocatoria os requisitos establecidos no artigo 4 e no número 2 dos anexos I, II e III (segundo cada caso).

a) As universidades públicas do SUG.



b) Os organismos públicos de investigación de Galicia.

c) As fundacións de investigación sanitaria de Galicia (Fundación Pública Galega Instituto de Investigación Sanitaria de Santiago de Compostela, Fundación Pública Galega de Investigación Biomédica INIBIC e Fundación Pública Galega Biomédica Galicia Sur). No caso dos Institutos de investigación sanitaria IDIS, INIBIC, IISGS e dos centros do ámbito do Servizo Galego de Saúde que xestionen as súas actividades de investigación mediante as citadas fundacións, poderán solicitar as axudas da presente convocatoria a través destas entidades.

d) Os centros do CSIC (Consello Superior de Investigacións Científicas) radicados en Galicia.

2. Non poderán ser beneficiarias das axudas as persoas ou entidades nas que concorra algunha das circunstancias que se indican no artigo 10 da Lei 9/2007, do 13 de xuño, de subvencións de Galicia.

Artigo 4. *Requisitos*

Cada un dos grupos de referencia competitiva ou de potencial crecemento que as entidades presenten a esta convocatoria deberá cumprir os requisitos sinalados no apartado 2 do anexo correspondente á modalidade á que concorra.

Non se poderá solicitar unha axuda das modalidades A ou B para un grupo de investigación que teña vixente outra axuda de calquera destas modalidades.

Cada investigador/a poderá formar parte da composición dun único grupo das modalidades A ou B.

Cada investigador/a poderá liderar ou formar parte do equipo dun único proxecto de excelencia da modalidade C desta convocatoria.

O persoal investigador que figure como coordinador dun grupo das modalidades A ou B non poderá liderar nin formar parte do equipo dun Proxecto de excelencia da modalidade C.

O persoal investigador que forme parte da composición dun grupo das modalidades A ou B, sen figurar como coordinador do grupo, poderá ademais liderar ou formar parte do equipo dun único Proxecto de excelencia da modalidade C.

Para o cumprimento dos requisitos tomarase en consideración o seguinte:



1. A certificación de ingresos de I+D do grupo será a referida ao período do 1 de xaneiro de 2023 ao 31 de decembro de 2025 e unicamente poderán contabilizarse aqueles que se produzan na entidade que presenta a solicitude ou naqueles entes nos que a entidade teña unha participación superior ao 20 %.

Para os grupos vinculados ao SUG contabilizaranse os que se produzan no Centro de Investigación e Tecnoloxía Matemática de Galicia (CITMAGA), na Fundación Empresa Universidade Galega (FEUGA) e nas fundacións de investigación biomédica ou sanitaria cando se correspondan aos institutos de investigación sanitaria do ámbito do sistema público de Saúde de Galicia. Para os grupos vinculados aos Institutos de Investigación Sanitaria de Galicia (IDIS, INIBIC e IISGS) contabilizaranse, ademais dos ingresos producidos nas entidades solicitantes, os ingresos producidos no resto das entidades integrantes dos citados institutos. En todos estes casos, tanto para os grupos vinculados ao SUG como para os grupos vinculados aos Institutos de investigación sanitaria de Galicia, a certificación de ingresos I+D deberá indicar ao grupo en concreto ao que corresponden os citados ingresos.

No caso de ingresos asentados noutras entidades, distintas das anteriores, vinculados coa actividade dos grupos de investigación, so poderán contabilizarse as cantidades que foran efectivamente reingresadas na entidade solicitante.

Para computar estes ingresos terase en conta o criterio de ingreso e non o de concesión ou sinatura, isto é, compútanse os ingresos obtidos desde o 1 de xaneiro de 2023 ata o 31 de decembro de 2025, con independencia de que os proxectos, contratos ou convenios fosen anteriores a esa data. Polo mesmo criterio, non se computarán os ingresos que se produzan máis aló do 31 de decembro de 2025 aínda que correspondan a axudas concedidas no período esixido.

2. Para a certificación dos ingresos de I+D do grupo e dos méritos sinalados no número 2 dos anexos I e II teranse en conta as seguintes situacións:

a) Se un/unha investigador/a abandonou o grupo durante o período de cómputo, o grupo computará os méritos e ingresos durante o período en que esa persoa estivo nel.

b) Se un/unha investigador/a se integrou no grupo durante o período de cómputo, o grupo poderá computar os méritos e ingresos unicamente desde que esa persoa causou alta nel.

c) Se un grupo incorpora un/ha investigador/a entre o 31 de decembro de 2025 e a data de publicación da convocatoria, esa persoa poderá contar para os efectos dos mínimos de



composición, pero non poderá achegar méritos ao grupo. Neste caso, a entidade solicitante deberá presentar unha certificación da relación específica dos membros que se incorporan neste período.

d) Nos casos excepcionais de grupos que se creasen *ex novo* durante o 2025 poderanse computar como ingresos e méritos aqueles que os/as investigadores/as que integran o novo grupo tivesen no período 2023-2025, con independencia de onde se contabilizasen e/ou producisen, incluídos aqueles que procedan de fóra do Sistema galego de I+D. Para o caso dos grupos das universidades públicas do SUG deberán estar inscritos como tal no rexistro da súa entidade antes do 30 de xuño de 2025.

e) No caso de fusión de grupos ou de absorción dun grupo ou grupos por outro, o novo grupo resultante poderá computar os méritos e ingresos de I+D do persoal investigador daqueles grupos que se integre como consecuencia da fusión ou absorción durante o período entre o 1 de xaneiro de 2023 e o 31 de decembro de 2025. Neste caso, a entidade solicitante deberá presentar unha certificación que acredite a desaparición de, cando menos, un dos grupos implicados na fusión ou absorción e a data na que se produce a mesma, así como unha relación dos membros que se integren no novo grupo.

Artigo 5. *Conceptos subvencionables*

Os importes das axudas irán destinados a financiar os seguintes conceptos, sempre que se relacionen coa actividade de consolidación:

1. Custo de contratación de persoal investigador, auxiliar de investigación, de persoal técnico colaborador. Inclúese o custo de persoal dedicado de xeito específico ás funcións de xestión do grupo, así como o cofinanciamento das persoas contratadas ao abeiro de convocatorias competitivas dos programas estatais de recursos humanos.

2. Equipamento informático (incluído custos de licenzas e programas informáticos, quedando excluídos os de carácter xeralista) Toda adquisición de equipamentos informáticos e de recursos tecnolóxicos deberá ter a súa xustificación en función dos requirimentos técnicos para a execución ou os obxectivos dos proxectos en que participa o grupo e será proporcionada ao tamaño do grupo.

3. Pequeno equipamento e material funxible (excluído material de oficina e funxible informático) directamente relacionado coa actividade do grupo.

4. Material bibliográfico. A adquisición de material bibliográfico ten que ser proporcionada e limitada ás dotacións necesarias para a consulta do grupo. Non se considerará nesta epígrafe a adquisición deste material polo persoal colaborador externo do grupo. Limitase a 3 unidades a



compra de libros dun mesmo exemplar. Limitáanse a 25 exemplares tanto as encadernacións de teses como a publicación das actas de congresos.

5. Custos de matrículas e inscricións a cursos, congresos, seminarios e coloquios do persoal do grupo e adhesión a sociedades científicas. Non se considerará nesta epígrafe o persoal colaborador externo do grupo.

6. Estadías dos membros do grupo para actividades directamente relacionadas cos obxectivos dos proxectos en que participa o grupo, cunha duración mínima de quince días e máxima de 90 días. Non se considerará nesta epígrafe o persoal colaborador externo do grupo.

7. Axudas de custo e locomoción de membros do grupo para a actividade obxecto da axuda. Non se considerará nesta epígrafe o persoal colaborador externo do grupo. Este epígrafe abarcará gastos de viaxe (billetes, quilometraxe do vehículo, peaxes e gastos de aparcadoiro), custos de comida e custos de aloxamento e o seu importe non poderá superar as contías máximas sinaladas no Decreto 144/2001, do 7 de xuño, sobre indemnizacións por razóns de servizo ao persoal con destino na Administración autonómica de Galicia (actualizado por Resolución do 24 de novembro de 2023 -DOG núm. 229, do 1 de decembro).

Para o caso da asistencia aos eventos regulados no punto 9 desta convocatoria admitirase a pernoita exclusivamente durante o día anterior e os días de realización do evento.

8. Axudas de custo e locomoción do persoal investigador visitante. Este epígrafe abarcará gastos de viaxe (billetes, quilometraxe do vehículo, peaxes e gastos de aparcadoiro), custos de comida e custos de aloxamento e o seu importe non poderá superar as contías máximas sinaladas no Decreto 144/2001, do 7 de xuño, sobre indemnizacións por razóns de servizo ao persoal con destino na Administración autonómica de Galicia (actualizado por Resolución do 24 de novembro de 2023 -DOG núm. 229, do 1 de decembro).

Para o caso da asistencia aos eventos regulados no punto 9 desta convocatoria admitirase a pernoita exclusivamente durante o día anterior e os días de realización do evento.

9. Organización de actividades de transferencia, divulgación e difusión (congresos, páxinas web, cursos, simposios, foros, exposicións). Queda excluído o gasto dun membro do grupo por impartir formación a outros membros do mesmo grupo. Queda excluído o gasto dos membros do grupo pola presentación de relatorios en congresos organizados polo grupo. Para o caso do material de



merchandising das actividades deste epígrafe establécese un límite máximo de gasto equivalente ao 10% do importe da axuda concedida ao grupo.

10. Publicación dos resultados da investigación en aberto (sempre e cando sexan como consecuencia da actividade do grupo).

11. Rexistro de patentes, gastos de consultaría e asesoramento externo para deseñar e aplicar a estrutura e a estratexia do grupo ou que xurdan do desenvolvemento da actividade do grupo, así como contratación de servizos externos entendidos como actividades prestadas por terceiros de forma puntual, tales como análises e ensaios de laboratorio, enxeñaría para a montaxe e operación, estudos e actividades complementarias, asistencia técnica e servizos equivalentes para a execución das actividades investigadoras propias dos grupos e proxectos.

12. Gastos derivados da elaboración dun informe de auditoría por cada grupo ou proxecto que obteña financiamento.

13. Custos indirectos que se calcularán anualmente, sen necesidade de achegar xustificantes de gasto, mediante a aplicación dunha porcentaxe de ata o 21 % sobre os gastos totais da axuda validamente xustificada. Desá porcentaxe e unicamente para o SUG, 5 puntos destinaranse a financiar as subscricións de cada entidade beneficiaria ás publicacións electrónicas.

A Secretaría Xeral de Universidades ou a Gain poderán ditar instrucións específicas para unha mellor definición dos conceptos subvencionables, así como da súa xustificación económica.

Para a xustificación da primeira anualidade da axuda admitiranse gastos e pagamentos realizados desde o 1 de xaneiro de 2026.

As entidades beneficiarias deberán someterse á disciplina de contratación pública nos termos previstos na Lei 9/2017, do 8 de novembro, de contratos do sector público.

Artigo 6. *Formalización e presentación de solicitudes*

1. As solicitudes presentaranse obrigatoriamente por medios electrónicos a través dos formularios normalizados ED431C (anexo VI) para a modalidade de grupos de referencia competitiva, ED431B (anexo VII) para grupos con potencial de crecemento, ED431F (anexo VIII) para proxectos de persoal investigador con traxectoria excelente, no caso de solicitudes presentadas por unha universidade do SUG, ou IN607A (anexo VI bis) para a modalidade de grupos de referencia competitiva, IN607B (anexo VII bis) para grupos con potencial de crecemento e IN607D (anexo VIII



bis) para proxectos de persoal investigador con traxectoria excelente, no caso de solicitudes presentadas polas demais entidades solicitantes, dispoñibles na sede electrónica da Xunta de Galicia, <https://sede.xunta.gal>.

Así mesmo, será necesaria a sinatura electrónica, con certificados electrónicos recoñecidos ou cualificados, dos documentos que deban asinar os/as representantes das entidades solicitantes, os/as coordinadores/as do grupo e os/as investigadores/as principais.

De conformidade co artigo 68.4 da Lei 39/2015, do 1 de outubro, do procedemento administrativo común das Administracións Públicas, se algunha das persoas interesadas presenta a súa solicitude presencialmente, será requirida para que a emende a través da súa presentación electrónica. Para estes efectos, considerarase como data de presentación da solicitude aquela na que fose realizada a emenda.

Para a presentación das solicitudes poderase empregar calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal>).

2. Nos formularios de solicitude, relacionados no punto 1 deste artigo, incluíranse as seguintes declaracións responsables:

- Declaración responsable de todas as axudas solicitadas e/ou concedidas para a mesma finalidade procedentes de calquera Administración ou entidade vinculadas ou dependentes delas ou no seu caso de non telas solicitado.

- Declaración responsable do compromiso de comunicar inmediatamente cantas axudas solicite ou obteña cos mesmos obxectivos que os establecidos nesta convocatoria doutras administracións públicas ou doutros entes públicos ou privados, nacionais ou internacionais, a partir da data desta declaración

- Declaración responsable de que todos os datos contidos na solicitude e nos documentos que se achegan son certos e que acepta as condicións e obrigas desta Orde.

- Declaración responsable de non estar incurso en ningunha das circunstancias previstas no artigo 13 da Lei 38/2003, do 17 de novembro, xeral de subvencións.



- Declaración responsable de non estar incurso en ningunha clase de inhabilitación para a obtención de axudas previstas nos números 2 e 3 do artigo 10 da Lei 9/2007, do 13 de xuño, de subvencións de Galicia.

- Declaración responsable de estar ao día no pagamento de obrigas por reintegro de subvencións, conforme o artigo 10.2.g) da Lei 9/2007, do 13 de xuño, de subvencións de Galicia, e o artigo 9 do Regulamento de subvencións de Galicia, aprobado polo Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

- Declaración responsable de que a entidade solicitante asumirá a aplicación de medidas antifraude eficaces e proporcionadas no seu ámbito de xestión, así como a obriga de comunicarlle ao órgano xestor os casos de sospeita de fraude.

- Declaración responsable de que a entidade solicitante cumprirá a normativa estatal e autonómica de aplicación, en particular a normativa en materia de subvencións.

3. Cada grupo de investigación unicamente poderá ser presentado como candidato por unha entidade e a unha das modalidades descritas, sempre e cando cumpra os requisitos exixidos.

4. O prazo de presentación de solicitudes será dun mes contado a partir do día seguinte ao da publicación desta orde no DOG. Entenderase como último día do prazo o correspondente ao mesmo ordinal do día da publicación.

Artigo 7. *Documentación complementaria*

1. As persoas interesadas deberán achegar coa solicitude (ademais da que se especifica en cada anexo para cada modalidade de axuda) a seguinte documentación:

— Certificados emitidos pola entidade á que pertence o grupo (ou na que estea adscrito este) ou o persoal investigador, que acrediten o cumprimento dos requisitos establecidos nos anexos I, II e III desta orde, correspondente á modalidade de axuda solicitada. Unha vez superado o proceso de selección, a Secretaría Xeral de Universidades ou a Gain poderán requirir os comprobantes dos méritos certificados das solicitudes seleccionadas. En caso de detectarse falsidade nalgún mérito, o órgano instructor correspondente adoptará as oportunas medidas legais, sen prexuízo do establecido no artigo 4.3. A referencia dos contidos mínimos obrigatorios destes certificados están nos enderezos web <http://www.edu.xunta.gal> e <http://gain.xunta.gal>



— De ser o caso, certificación asinada pola persoa representante legal da entidade solicitante de que conta con toda a documentación exixida pola lexislación para a investigación con animais.

2. A documentación complementaria deberá presentarse electronicamente.

Se algunha das persoas interesadas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela en que fose realizada a emenda.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o esixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

3. Sempre que se realice a presentación de documentos separadamente da solicitude, deberase indicar o código e o órgano responsable do procedemento, o número de rexistro de entrada da solicitude e o número de expediente, se se dispón del.

Artigo 8. *Comprobación de datos*

1. Para a tramitación destes procedementos consultarase automaticamente os datos incluídos nos seguintes documentos en poder da Administración actuante ou elaborados polas administracións públicas agás que a persoa interesada se opoña á súa consulta:

a) DNI ou NIE da persoa representante da entidade solicitante.

b) Certificado acreditativo de estar ao día nas obrigas tributarias coa Axencia Estatal da Administración Tributaria.

c) Certificado acreditativo de estar ao día no pagamento coa Seguridade Social.

d) Certificado acreditativo de estar ao día no pagamento das débedas coa Administración da comunidade autónoma.

2. No caso de que as persoas interesadas se opoñan a esta consulta, deberán indicalo no recadro correspondente habilitado nos formularios de inicio e achegar os devanditos documentos. Estes



documentos poderán substituírse por unha declaración responsable do solicitante de conformidade co artigo 11 de Regulamento da Lei 9/2007, de 13 de xuño, de subvencións de Galicia.

Cando así o esixa a normativa aplicable solicitarase o consentimento expreso da persoa interesada para realizar a consulta.

3. Excepcionalmente, no caso de que algunha circunstancia imposibilitase a obtención dos citados datos, poderáselles solicitar ás persoas interesadas a presentación dos documentos correspondentes.

Artigo 9. Trámites administrativos posteriores á presentación de solicitudes

Todos os trámites administrativos que as persoas solicitantes deban realizar tras a presentación da solicitude deberán ser efectuados electronicamente accedendo á Carpeta cidadá da persoa interesada dispoñible na sede electrónica da Xunta de Galicia.

Artigo 10. Instrución do procedemento

A instrución do procedemento de concesión destas axudas correspóndelle á Secretaría Xeral de Universidades para as solicitudes presentadas por unha universidade do SUG e á Gain para as restantes solicitudes. Para este fin, comprobarán que todas as solicitudes reúnen os requisitos establecidos nesta orde, exporán as listas de solicitudes admitidas e excluídas e sinalarán, se é o caso as causas de exclusión. As listas publicaranse na internet nos enderezos <http://www.edu.xunta.gal> (na epígrafe da Secretaría Xeral de Universidades) e <http://gain.xunta.gal>.

Estas listas estarán expostas por un período de dez (10) días hábiles e durante este prazo as entidades solicitantes poderán formular reclamacións para emendaren erros e falta de documentos das persoas interesadas ante a Secretaría Xeral de Universidades, no caso das universidades públicas do SUG, ou ante a Dirección da Gain, nos demais casos, para o cal presentarán a documentación necesaria. Transcorrido este prazo sen que se emenden as causas da exclusión, considerarase que a entidade solicitante desiste da súa petición, nos termos establecidos no artigo 68 da Lei 39/2015, do 1 de outubro, do procedemento administrativo común das administracións públicas.

Sen prexuízo do disposto no punto anterior, poderase requirir á entidade solicitante para que achegue cantos datos, documentos complementarios e aclaracións resulten necesarios para a tramitación e resolución dos procedementos.



Unha vez transcorrido o prazo para as emendas ou alegacións, as persoas titulares da Secretaría Xeral de Universidades e da dirección da Gain ditarán unha resolución pola cal se aproban as listas definitivas das solicitudes admitidas e excluídas, que se publicará na internet no enderezo <http://www.edu.xunta.gal> e <http://gain.xunta.gal>. Contra esta resolución as persoas interesadas poderán interpoñer recurso de alzada, ante a persoa titular da Consellería de Educación, Ciencia, Universidades e Formación Profesional, no caso de solicitudes do SUG, ou ante a Presidencia da Gain, nos demais casos, segundo o disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas.

O feito de non axustarse aos termos da convocatoria, o incumprimento dos requisitos establecidos nela, a ocultación de datos, a súa alteración ou calquera manipulación da información solicitada será causa de desestimación da solicitude presentada, con independencia de que se poidan acordar outro tipo de actuacións.

A presentación da solicitude implica o coñecemento e aceptación destas bases reguladoras.

Artigo 11. *Avaliación e selección*

A selección das propostas destinatarias das axudas realizarase a partir da suma das valoracións feitas por un panel de avaliadores/as externos/as e polos órganos xestores da Secretaría Xeral de Universidades (Servizo de Planificación e Estruturación da Investigación da Subdirección de Promoción Científica e Tecnolóxica Universitaria), para as solicitudes presentadas polas universidades públicas do SUG, ou da Gain (Área de Xestión), para as restantes solicitudes.

O panel de avaliadores/as externos/as estará formado por persoas expertas de fóra do Sistema galego de I+D+i propostas e aprobadas pola Comisión Galega de Informes, Avaliación, Certificación e Acreditación (CGIACA), que cubrirán as diferentes ramas de coñecemento: Artes e Humanidades, Ciencias, Ciencias da Saúde, Ciencias Sociais e Xurídicas e Enxeñaría e Arquitectura. A valoración das solicitudes presentadas referirase á produción e calidade científica e á idoneidade da programación proposta de acordo cos obxectivos de cada unha das modalidades da convocatoria.

O panel de avaliadores/as externos/as non avaliará os méritos que non se correspondan co período computable nesta convocatoria (do 1 de xaneiro de 2023 ao 31 de decembro de 2025) e poderá aplicar unha penalización na puntuación final de ata o 25% no caso de que na documentación presentada figuren méritos que non se correspondan co período de cómputo.



Así mesmo, o panel de avaliadores/as externos/as poderá realizar comparativas dos méritos presentados nesta convocatoria con aqueles do mesmo período de cómputo (do 1 de xaneiro de 2023 ao 31 de decembro de 2025) presentados para a avaliación final dos grupos de referencia competitiva e de potencial crecemento das convocatorias dos anos 2022 e 2023 respectivamente. No caso de detectar incoherencias neses méritos, poderá aplicar unha penalización na puntuación final de ata o 25%

Os criterios de avaliación das solicitudes presentadas aparecen recollidos nos anexos IV e V desta orde, baseados principalmente nunha avaliación cualitativa apoiada polo uso responsable de indicadores cuantitativos, conforme aos principios CoARA (Coalición para el Avance de la Evaluación de la Investigación). Para garantir que as propostas financiadas teñan un nivel de calidade suficiente, só poderán recibir as axudas establecidas nesta convocatoria aquelas solicitudes que obteñan unha puntuación total igual ou superior a 60 puntos dos que pode outorgar o panel de avaliadores/as externos/as e que, de ser o caso, teñan recoñecida unha avaliación positiva final do desempeño da axuda en anteriores convocatorias ás cales se presentasen, de acordo coa normativa específica establecida para cada unha delas.

Modalidades A e B: O panel de avaliadores/as externos/as poderá asignar ata un máximo de 95 puntos a cada solicitude. Para as solicitudes que superen a puntuación mínima nas valoracións feitas polo panel de avaliadores/as externos/as, os órganos xestores da Secretaría Xeral de Universidades e da Gain outorgarán a seguinte puntuación de acordo cos criterios establecidos no anexo IV: no caso das solicitudes presentadas polas universidades públicas do SUG, o órgano xestor da Secretaría Xeral de Universidades outorgará ata un máximo de 5 puntos a cada solicitude, e no caso das solicitudes presentadas polas restantes entidades o órgano xestor da Gain outorgará ata un máximo de 2 puntos a cada solicitude.

Modalidade C: o panel de avaliadores/as externos/as poderá asignar ata un máximo de 100 puntos a cada solicitude.

O proceso de avaliación externa será realizado por persoas expertas de fóra do Sistema Universitario de Galicia, propostas e aprobadas pola Comisión Galega de Informes, Avaliación, Certificación e Acreditación (CGIACA) da Axencia para a Calidade do Sistema Universitario de Galicia (ACSUG).

A comisión de selección será o órgano colexiado encargado de elaborar o informe para os órganos instrutores e estará constituída por seis membros:



— O/a subdirector/a xeral de Promoción Científica e Tecnolóxica Universitaria da Secretaría Xeral de Universidades ou persoa en quen delegue, ou o/a director/a da Área de Xestión da Gain ou persoa en quen delegue, que actuará como presidente/a da comisión.

Serán vogais da comisión:

— O/a subdirector/a xeral de Universidades da Secretaría Xeral de Universidades, ou persoa en quen delegue.

— Dous/Dúas directores/as de área da Gain ou persoa/s en quen deleguen.

— Un/unha xefe/a de servizo da Secretaría Xeral de Universidades ou persoa en quen delegue.

— Un/unha xefe/a de servizo da Secretaría Xeral de Universidades, que actuará como secretario/a da comisión.

A comisión de selección, sen prexuízo do disposto no artigo 19 desta convocatoria, elaborará para os órganos instrutores un informe, que será a acta da reunión, que incluírá o informe de avaliación do panel de avaliadores/as externos/as, as puntuacións outorgadas (de ser o caso) polos órganos xestores da Secretaría Xeral de Universidades ou da Gain e unha prelación das solicitudes ordenadas por puntuación por orde decrecente de puntuación ata que se produza algunha das seguintes circunstancias:

a) Que non haxa crédito suficiente para financiar a seguinte solicitude na prelación elaborada, ben porque se esgotou o crédito previsto nas bases, ben porque o remanente de crédito sexa insuficiente para o seu financiamento.

b) Que a puntuación da solicitude que corresponde financiar non acade o valor mínimo de 60 puntos outorgados polo panel de avaliadores/as externos/as.

En caso de igualdade de puntuación nas modalidades A e B, grupos de referencia competitiva e grupos con potencial de crecemento, aplicaranse os seguintes criterios de desempate:

1º O grupo que obteña maior puntuación na valoración da actividade investigadora (anexo IV, criterio B)

2º O grupo que obteña maior puntuación na valoración da estratexia do grupo de investigación (anexo IV, criterio C)



3º O grupo que obteña maior puntuación na valoración da estrutura/organización de investigación: tamaño do grupo, mecanismos de xestión e organización e infraestruturas (anexo IV, criterio A)

En caso de igualdade de puntuación na modalidade C, proxectos de persoal investigador con traxectoria excelente, aplicaranse os seguintes criterios de desempate:

1º O proxecto de investigación que obteña maior puntuación na valoración da calidade científico-técnica do proxecto (anexo V, criterio A)

2º O proxecto de investigación que obteña maior puntuación na valoración da viabilidade do proxecto (anexo V, criterio B)

3º O proxecto de investigación que obteña maior puntuación na valoración da capacidade científico-técnica do equipo de investigación para a realización do proxecto (anexo V, criterio C)

Para cada entidade concedente, e no caso de que exista crédito sobrannte nalgunha das modalidades, e sempre que sexa suficiente, a Comisión de selección proporá aos órganos instrutores a redistribución do importe entre as restantes modalidades, logo de aprobación da modificación orzamentaria que proceda no seu caso, coa seguinte orde de prioridade: grupos de referencia competitiva, grupos con potencial de crecemento, proxectos de persoal investigador con traxectoria excelente - liña de reforzo da traxectoria investigadora consolidada e proxectos de persoal investigador con traxectoria excelente - liña de reforzo de traxectorias emerxentes.

Os órganos instrutores elaborarán a proposta de resolución a partir da acta da comisión, que servirá como informe, e se publicará na internet, nas epígrafes de axudas <http://www.edu.xunta.gal> e <http://gain.xunta.gal>. Esta publicación só terá efectos informativos.

Artigo 12. *Resolución*

A competencia para resolver estas axudas correspóndelles conxuntamente, por delegación da persoa titular da Consellería de Educación, Ciencia, Universidades e Formación Profesional e da persoa titular da presidencia da Axencia Galega de Innovación, á persoa titular da Secretaría Xeral de Universidades e á persoa titular da dirección da Axencia Galega de Innovación.

Os órganos instrutores elevarán a proposta de resolución, que incluírá, para cada entidade beneficiaria, a relación de solicitudes seleccionadas co importe da axuda concedida. Con cargo aos



créditos da Secretaría Xeral de Universidades financiaranse as axudas correspondentes ás universidades públicas do SUG; e a Gain asumirá o financiamento das restantes entidades.

A resolución publicarase no *Diario Oficial de Galicia* e na páxina web da Consellería de Educación, Ciencia, Universidades e Formación Profesional (<http://www.edu.xunta.gal>) e da Gain (<http://gain.xunta.gal>), pola cal se entenderán notificadas para todos os efectos as persoas solicitantes, de conformidade co artigo 45 da Lei 39/2015, do 1 de outubro, do procedemento administrativo común das administracións públicas.

Unha vez concedida a subvención, esta deberá ser aceptada pola entidade beneficiaria no prazo de dez (10) días hábiles contados a partir do día seguinte ao da publicación da resolución no DOG, coas condicións específicas que recolle esta orde.

Todas as solicitudes serán resoltas no prazo máximo de cinco (5) meses, contados desde a publicación da orde de convocatoria. A non resolución en prazo faculta ás persoas interesadas para entender desestimadas as súas solicitudes por silencio administrativo.

Esta resolución pon fin á vía administrativa e contra ela poderá interpoñerse recurso potestativo de reposición ante o mesmo órgano que ditou a resolución impugnada no prazo dun mes contado a partir do día seguinte ao da publicación da resolución no DOG, ou ben directamente recurso contencioso-administrativo ante a Sala do Contencioso-Administrativo do Tribunal Superior de Xustiza de Galicia, no prazo de dous meses contados dende o día seguinte ao da publicación no DOG.

Artigo 13. *Notificacións*

1. As notificacións de resolucións e actos administrativos practicaranse só por medios electrónicos, nos termos previstos na normativa reguladora do procedemento administrativo común.

2. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do Sistema de notificacións electrónicas de Galicia, Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.



3. De conformidade co artigo 47 da Lei 4/2019, do 17 de xullo, de administración dixital de Galicia, as persoas interesadas deberán crear e manter o seu enderezo electrónico habilitado único a través do Sistema de Notificación Electrónica de Galicia - Notifica.gal, para todos os procedementos administrativos tramitados pola Administración xeral e as entidades instrumentais do sector público autonómico. En todo caso, a Administración xeral e as entidades do sector público autonómico de Galicia poderá de oficio crear o indicado enderezo, para os efectos de asegurar o cumprimento polas persoas interesadas da súa obriga de relacionarse por medios electrónicos.

4. As notificacións entenderanse practicadas no momento en que se produza o acceso ao seu contido e entenderanse rexeitadas cando transcorresen dez días naturais desde a posta á disposición da notificación sen que se acceda ao seu contido.

5. Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

Artigo 14. *Libramento da subvención*

En todas as modalidades de axuda, a subvención será librada á entidade beneficiaria á cal pertenza o grupo (ou na que estea adscrito este) ou o persoal investigador, conforme a resolución de concesión e de acordo coa normativa vixente.

Para poder proceder ao libramento dos fondos será preciso que a entidade beneficiaria remita, na data límite do 20 de novembro no caso das universidades públicas do SUG, e do 30 de novembro no caso do resto das entidades, do exercicio correspondente á anualidade de que se trate, a seguinte documentación:

1. Xustificación da realización do gasto e do pagamento:

Certificación expresiva da realización do gasto e do pagamento da Intervención ou do órgano que teña atribuídas as facultades de control da toma de razón en contabilidade e do cumprimento da finalidade para a cal foi concedida, en aplicación do artigo 27 da Lei 12/2014, do 22 de decembro, de medidas fiscais e administrativas, acompañada dunha memoria explicativa do logro dos obxectivos de consolidación e estruturación do grupo ou proxecto. Esta memoria explicativa irá asinada pola persoa coordinadora do grupo de investigación ou proxecto.



Así mesmo, o órgano competente en materia de investigación da entidade beneficiaria acreditará que o gasto realizado corresponde exclusivamente a conceptos subvencionables enumerados no artigo 5 da presente Orde.

Na mesma certificación acreditarase expresamente que o importe do gasto relativo ás axudas de custo e locomoción é conforme ao Decreto 144/2001, de 7 de xuño, sobre indemnizacións por razón do servizo ao persoal con destino na Administración autonómica de Galicia (actualizado por Resolución do 24 de novembro de 2023 -DOG núm. 229, do 1 de decembro).

2. Informe de auditor/a inscrito/a como exercente no Rexistro Oficial de Auditores/as de Contas, que se deberá manifestar sobre os conceptos, período de realización e pagamento dos gastos presentados nesa anualidade. O informe de auditoría axustarase ao disposto na Orde EHA/1434/2007, do 17 de maio, pola que se aproba a norma de actuación dos/as auditores/as de contas na realización dos traballos de revisión das contas xustificativas de subvencións.

3. Certificación das variacións na composición do grupo ou equipo do proxecto durante a anualidade que se xustifica, con indicación da datas das altas e baixas producidas no período.

4. No suposto de que a entidade solicitante se opoña á consulta por parte do órgano xestor para solicitar as certificacións que deban emitir a Axencia Estatal da Administración Tributaria, a Tesouraría Xeral da Seguridade Social e a Axencia Tributaria de Galicia, deberá achegar a documentación acreditativa de se encontrar ao día nas súas obrigas tributarias estatais e autonómicas e coa Seguridade Social e de non ter pendente de pagamento ningunha outra débeda coa Administración da Comunidade Autónoma. Estas certificacións poderán substituírse por unha declaración responsable do solicitante, de conformidade co artigo 11 de Regulamento da Lei 9/2007.

5. Declaración complementaria do conxunto das axudas solicitadas, tanto as aprobadas ou concedidas como as pendentes de resolución, para o mesmo fin, das distintas administracións públicas competentes ou dos seus organismos, entes ou sociedades.

Segundo o establecido no artigo 45.2 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, transcorrido o prazo establecido de xustificación sen se ter presentado ante o órgano administrativo competente, este requirirá a entidade beneficiaria para a presente no prazo improrrogable de dez (10) días hábiles. A falta de presentación da xustificación comportará a perda do dereito ao cobramento parcial ou total da subvención, a exixencia do reintegro e demais responsabilidades establecidas na Lei de subvencións de Galicia.



Poderán realizarse pagamentos parciais á conta da liquidación final nas condicións establecidas na normativa vixente.

Poderán realizarse pagamentos anticipados que supoñan entregas de fondos con carácter previo á xustificación, como financiamento necesario para poder levar a cabo as actuacións inherentes á subvención e ata un máximo do 50% da subvención concedida para cada anualidade. A concesión do anticipo realizarase mediante resolución motivada, logo de solicitude debidamente xustificada da entidade beneficiaria, que se deberá realizar como máximo nos tres meses seguintes á concesión da axuda na primeira anualidade e nos tres primeiros meses do ano para as seguintes anualidades.

Poderán realizarse pagamentos parciais a conta da liquidación final que, xunto cos pagamentos anticipados en ningún caso poderán superar o 100 % da axuda concedida.

Estes pagamentos están exentos da presentación de garantías de acordo co disposto no artigo 65.4 do Regulamento da Lei 9/2007, de 13 de xuño, de subvencións de Galicia.

Nos proxectos plurianuais, enténdese que os investimentos e pagamentos que se efectúen desde a data límite de xustificación da anualidade corrente ata final de ano corresponden á anualidade seguinte e, polo tanto, poderán presentarse como xustificante para o cobramento desa anualidade.

No caso dos custos de contratación de persoal investigador ou auxiliar, os pagamentos das nóminas e Seguridade Social dos meses de outubro e novembro de cada anualidade poderán presentarse como xustificantes para o cobramento da anualidade seguinte.

As entidades beneficiarias deberán facilitar cantos datos resulten necesarios para a valoración do instrumento no marco da avaliación da RIS3 Galicia ou doutros mecanismos, en particular as enquisas do INE, relacionados coa medición da I+D+i. Os datos asignados aos citados instrumentos de avaliación deberán estar consignados á Comunidade Autónoma de Galicia. No marco de seguimento e avaliación da RIS3 Galicia, desenvolverase un seguimento específico das axudas concedidas. Este seguimento estará baseado na recompilación de información acerca dos resultados económicos e científico-técnicos obtidos polas entidades beneficiarias. Para tales efectos, durante a execución e ao finalizar a axuda (*expost*), os beneficiarios deberán proporcionar información relativa a unha serie de indicadores, entre os que se incluírán indicadores xerais e específicos de I+D+i.

Artigo 15. *Modificación da resolución de concesión de axudas*



Poderase modificar a resolución de concesión da axuda, tal como se especifica no artigo 17 da Lei 9/2007, do 13 de xuño, de subvencións de Galicia, cando se alteren as condicións tidas en conta para a concesión da subvención e, en todo caso, pola obtención concorrente de subvencións ou axudas outorgadas por outras administracións ou entes públicos ou privados, estatais ou internacionais. Por iso, cando a entidade beneficiaria reciba outros fondos cos mesmos obxectivos que os establecidos nesta convocatoria, deberá comunicarllo á Secretaría Xeral de Universidades ou á Gain (de ser o caso).

Artigo 16. *Réxime de compatibilidade*

As axudas concedidas serán compatibles con outras axudas ou subvencións, de acordo co establecido na normativa aplicable, coas excepcións que se indican a continuación:

a) Cando o importe das axudas concedidas, illadamente ou en concordancia con outras, supere o custo da actividade subvencionada. Por iso, cando a entidade beneficiaria reciba outros fondos cos mesmos obxectivos que os establecidos nesta convocatoria, deberá poñelo en coñecemento da entidade financiadora.

b) Cando o grupo teña concedida outra axuda da Consellería de Educación, Ciencia, Universidades e Formación Profesional ou da Gain para a mesma actividade. Un mesmo grupo non poderá recibir simultaneamente axudas das modalidades de grupos de referencia competitiva e de grupos con potencial de crecemento.

Artigo 17. *Incumprimento, renuncias, reintegros e sancións*

O incumprimento das obrigas contidas nesta orde ou na demais normativa aplicable, así como das condicións que, se é o caso, se establezan na resolución da concesión, dará lugar á obriga de devolver total ou parcialmente as subvencións percibidas, así como os xuros de demora correspondentes.

Para facer efectiva a devolución a que se refire o punto anterior, tramitarase o oportuno procedemento de reintegro, que se axustará ao previsto no artigo 38 da Lei 9/2007, do 13 de xuño, de subvencións de Galicia.

As entidades beneficiarias, grupos de investigación e aos/ás directores/as de proxecto destinatarios/as das subvencións reguladas nesta orde seralles de aplicación o réxime de infraccións e sancións previsto na Lei 9/2007, do 13 de xuño, de subvencións de Galicia.



No caso de que a entidade beneficiaria, o grupo de investigación ou o/a director/a de proxecto renuncie ás axudas unha vez percibidas, procederase consonte o establecido no artigo 38 da Lei 9/2007, do 13 de xuño, de subvencións de Galicia.

Artigo 18. *Control*

A Consellería de Educación, Ciencia, Universidades e Formación Profesional, a través dos órganos competentes, e a Gain poderán levar a cabo as actividades de inspección que consideren oportunas para controlar o cumprimento das subvencións. En particular, poderán someter a todas as entidades beneficiarias, grupos de investigación e directores/as de proxectos destinatarios/as das axudas desta convocatoria a procesos de avaliación de acordo coas condicións que se establecen en cada un dos anexos.

Alén do anterior, as subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas, do Consello de Contas e doutros organismos autonómicos, estatais e europeos con funcións de control.

Artigo 19. *Dotación orzamentaria*

Esta orde tramítase conforme o establecido na Orde da Consellería de Economía e Facenda do 11 de febreiro de 1998, modificada polas ordes do 27 de novembro do 2000 e do 25 de outubro de 2001, relativa á tramitación anticipada de expedientes de gasto, polo que queda condicionada a súa eficacia a que exista crédito adecuado e suficiente nos orzamentos da Comunidade Autónoma de Galicia para o vindeiro ano 2026, aprobados polo Consello da Xunta de Galicia e en trámite parlamentario actualmente.

As axudas imputaranse ás seguintes aplicacións orzamentarias, coa seguinte desagregación por anos:

Modalidade	Entidade beneficiaria	Aplicación orzamentaria	Crédito (en euros)					
			2026	2027	2028	2029	2030	Total
Mod. a) GRC	Universidades públicas do SUG	07.02.561B.744.0	3.815.000	3.815.000	3.815.000	3.815.000		15.260.000
	Outras entidades	07.A2.561A.703.0	595.000	595.000	595.000	595.000		2.380.000
Mod. b) GPC	Universidades públicas do SUG	07.02.561B.744.0	1.942.500	1.942.500	1.942.500			5.827.500
	Outras entidades	07.A2.561A.703.0	335.000	335.000	335.000			1.005.000



Modalidade		Entidade beneficiaria	Aplicación orzamentaria	Crédito (en euros)					
				2026	2027	2028	2029	2030	Total
Mod. c) Proxectos de Excelencia	**Liña traxectoria consolidada	Universidades públicas do SUG	07.02.561B.744.0	100.000	100.000	100.000	100.000		400.000
	**Liña traxectoria emerxente	Universidades públicas do SUG	07.02.561B.744.0	420.000	700.000	700.000	700.000	700.000	3.220.000
	Total universidades públicas do SUG			520.000	800.000	800.000	800.000	700.000	3.620.000
	**Liña traxectoria emerxente	Outras entidades	07.A2.561A.703.0	105.000	175.000	175.000	175.000	175.000	805.000
Total universidades públicas do SUG				6.277.500	6.557.500	6.557.500	4.615.000	700.000	24.707.500
Total outras entidades				1.035.000	1.105.000	1.105.000	770.000	175.000	4.190.000
Total convocatoria				7.312.500	7.662.500	7.662.500	5.385.000	875.000	28.897.500

A concesión das axudas queda condicionada á existencia de crédito adecuado e suficiente no momento da resolución de concesión.

Todos os actos de trámite ditados no expediente de gasto entenderanse condicionados a que no momento de ditarse a resolución, unha vez aprobado o orzamento, subsistan as mesmas circunstancias de feito e de dereito existentes no momento en que se produciron.

As axudas que correspondan ás universidades públicas do SUG imputaranse ao Plan galego de financiamento universitario para o período 2022-2026. As anualidades 2027, 2028, 2029 e 2030 integraranse con cargo ao novo Plan de financiamento universitario que se aprobe no seu momento.

Os créditos poderán ser redistribuídos por cada unha das entidades financiadoras entre as diferentes modalidades e anualidades cando o volume de solicitudes presentadas e avaliadas favorablemente así o requira e segundo o establecido no artigo 11.

Respecto aos créditos da Gain, unha vez valoradas as solicitudes e feita a proposta de resolución de concesión das axudas, adecuaranse os conceptos orzamentarios atendendo á natureza xurídica das posibles entidades beneficiarias, tendo en conta a vinculación de créditos que, conforme a Lei 16/2010, do 17 de decembro, de organización e funcionamento da Administración xeral e do sector público autonómico de Galicia, rexe para as axencias, sen incrementar a distribución global prevista na convocatoria.

O importe máximo inicial do crédito destinado aos programas e subvencións obxecto desta convocatoria poderá ser ampliado en función das solicitudes e das dispoñibilidades orzamentarias,



nos supostos e nas condicións previstas no artigo 30.2 do Decreto 11/2009, de 8 de xaneiro, polo que se aproba o Regulamento da Lei 9/2007, de 13 de xuño, de subvencións de Galicia. O incremento do importe queda condicionado á declaración de dispoñibilidade do crédito e, no seu caso, previa aprobación da modificación orzamentaria que proceda. A ampliación de crédito publicarase nos mesmos medios que a convocatoria sen que iso implique a apertura de prazo para presentar novas solicitudes nin o inicio de novo cómputo de prazo para resolver.

De acordo co disposto no artigo 2.1.1 da Comunicación da Comisión sobre o Marco comunitario sobre axudas estatais de investigación, desenvolvemento e innovación (2022/C414/01), publicado no Diario Oficial da Unión Europea C144, do 28 de outubro de 2022, non se aplicará o disposto no artigo 107.1 do Tratado de funcionamento da Unión Europea ás axudas previstas nesta orde, que se outorgarán a organismos de investigación para actividades non económicas. As entidades beneficiarias que, ademais de actividades non económicas, realicen tamén actividades económicas, deberán consignar por separado o financiamento, os custos e os ingresos respectivos.

Cando o organismo de investigación realice case exclusivamente actividades non económicas, poderán quedar excluídos na súa totalidade do ámbito de aplicación do artigo 107.1 do Tratado de funcionamento da Unión Europea, sempre que as súas actividades económicas sexan puramente accesorias; é dicir, que correspondan a unha actividade que estea relacionada directamente co seu funcionamento, ou sexa necesaria para o funcionamento do organismo de investigación, ou estea estreitamente vinculada o seu principal uso non económico, e teña un alcance limitado.

Considerarase que isto se produce cando as actividades económicas consomen exactamente os mesmos insumos (como material, equipamento, man de obra e capital fixo) que as actividades non económicas, e a capacidade asignada cada ano a estas actividades económicas non supera o 20 % da capacidade anual total da entidade de que se trate.

Artigo 20. *Transparencia e bo goberno*

1. Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

2. En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da Lei 1/2016, do 18 de



xaneiro, á que se atopen vinculadas, previo requirimento, toda a información necesaria para o cumprimento por aquela das obrigas previstas no título I da citada lei.

Artigo 21. Información sobre a subvención.

De conformidade co previsto nos artigos 17.3.b) e 20.8.a) da Lei 38/2003, de 17 de novembro, xeral de subvencións, transmitirase á Base de datos nacional de subvencións a información requirida por esta, o texto da convocatoria para a súa publicación na citada base e o seu extracto no *Diario Oficial de Galicia*.

Artigo 22. *Remisión normativa*

A presente orde sométese ao réxime de axudas públicas establecido na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o regulamento que a desenvolve.

Artigo 23. *Recursos*

Esta orde poderá ser recorrida mediante recurso potestativo de reposición, ante a persoa titular da Consellería de Educación, Ciencia, Universidades e Formación Profesional, no prazo dun mes a partir do día seguinte ao da súa publicación no DOG, segundo o disposto nos artigos 123 e 124 da Lei 39/2015, do 1 de outubro, do procedemento administrativo común das administracións públicas, ou ben directamente recurso contencioso-administrativo no prazo de dous meses, ante o Tribunal Superior de Xustiza de Galicia, de conformidade co artigo 46 da Lei 29/1998, do 13 de xullo, reguladora da xurisdición contencioso-administrativa.

Disposición derradeira única. *Entrada en vigor*

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, XXXXXX.

O conselleiro de Educación, Ciencia, Universidades e Formación Profesional

P.D. (Orde do 05/06/2024)

O secretario xeral técnico da Consellería de Educación, Ciencia, Universidades e Formación Profesional

Manuel Vila López

INSÍRAXE NO DOG

O secretario xeral técnico

Manuel Vila López



ANEXO I

Modalidade A. Grupos de referencia competitiva

1. Obxecto da axuda

Axudas para a consolidación de grupos de investigación das entidades solicitantes que, pola súa produción científica e a súa actividade de I+D, constitúan unha referencia no Sistema galego de I+D+i.

2. Requisitos

Ser un grupo de investigación recoñecido pola entidade solicitante que cumpra os criterios seguintes:

a) O grupo de investigación deberá estar integrado, durante toda a vixencia da axuda, polo menos por cinco (5) investigadores/as e, no caso das universidades públicas do SUG, deberá constar inscrito como tal nos rexistros da súa entidade antes do 30 de xuño de 2025.

Excepcionalmente, para o caso de grupos novos que se creen por fusión ou absorción doutros grupos que contaran con esta axuda activa no ano 2025 o novo grupo deberá constar inscrito como tal nos rexistros da súa entidade antes do 31 de decembro de 2025.

Na avaliación dos grupos novos resultantes dunha fusión ou absorción doutros grupos terase en conta a coherencia do novo grupo en canto ás liñas de investigación, traxectoria de colaboracións entre os membros, publicacións conxuntas, ou calquera outra circunstancia que xustifique a fusión ou absorción en termos de mellora da excelencia científica do novo grupo creado.

Na avaliación dos grupos novos resultantes dunha fusión ou absorción doutros grupos que contaran con esta axuda activa no ano 2025, e desapareceran como consecuencia desa fusión ou absorción, terase en conta a Memoria presentada polos grupos integrantes, conforme ao indicado no punto 4.9 deste anexo, para a valoración da súa traxectoria ata a data que figure no certificado da entidade acreditativo da súa desaparición como grupo.

Cando se produza calquera variación que afecte á composición mínima do grupo, ou á persoa que exerce a función de coordinador/a, deberá ser notificada no prazo máximo dun mes.



b) Cumprir, como mínimo, un dos seguintes requisitos no período do 1 de xaneiro de 2023 ao 31 de decembro de 2025:

b.1) Ter polo menos tres (3) proxectos competitivos activos, cun importe superior a 15.000 € cada un, ou ter polo menos un (1) proxecto competitivo activo, cun importe superior a 75.000 €, no período comprendido entre o 1 de xaneiro de 2023 e o 31 de decembro de 2025. Deberá indicarse de xeito específico a cota de participación do grupo no proxecto e que este estea directamente relacionado coa actividade investigadora do grupo. A estes efectos computarase como proxecto activo aquel que teña ingresos no período comprendido entre o 1 de xaneiro de 2023 e o 31 de decembro de 2025.

b.2) Ter ingresos do grupo medios anuais por actividades de I+D superiores a 150.000 € (ou superior a 80.000 € cando se trate de grupos das ramas de coñecemento de Artes e Humanidades ou Ciencias Sociais e Xurídicas), no período comprendido entre o 1 de xaneiro de 2023 e o 31 de decembro de 2025.

b.3) Ter sido beneficiario das axudas a grupos de referencia competitiva do Programa de consolidación e estruturación de unidades de investigación competitivas na convocatoria do ano 2022.

c) Cumprir, polo menos, dous dos seguintes criterios de produción científica no período do 1 de xaneiro de 2023 e o 31 de decembro de 2025:

c.1) Artigos en publicacións incluídas en SCOPUS ou *Web of Science*: polo menos dez (10) publicacións. No caso dos grupos das ramas de coñecemento de Artes e Humanidades e Ciencias Sociais e Xurídicas consideraranse artigos en publicacións Dialnet, CIRC, ERIH+, LATINDEX e JCR.

c.2) Libros publicados: polo menos tres (3) (só para grupos das ramas de coñecemento de Artes e Humanidades ou Ciencias Sociais e Xurídicas, sempre que sexa autor/a individual ou coautor/a entre un máximo de tres (3) autores/as).

c.3) Teses dirixidas/codirixidas e lidas: polo menos tres (3) teses para os grupos do SUG e polo menos dúas (2) para o resto de entidades alleas ao SUG.

c.4) Patentes en explotación en que a entidade solicitante sexa titular: polo menos unha (1) patente (ou catro (4) rexistros de propiedade intelectual de *software* ou catro (4) rexistros de variedades vexetais).



c.5) Acordos de explotación ou empresas (EBTs) xerados a partir de resultados obtidos polo grupo: polo menos un (1) acordo ou EBT. Poderán ser empresas creadas antes do 1 de xaneiro de 2023, sempre que teñan actividade probada desde esa data ata o momento da solicitude.

c.6) Participación, como líder de proxecto ou de *workpackage*, en proxectos de programa marco da UE: polo menos un (1) liderado de proxecto.

3. Contía e duración

As axudas terán unha duración máxima de catro anos. O importe total de cada unha das axudas virá determinado por unha contía estrutural máis outra variable asociada á evolución na xeración de recursos por parte do grupo como un indicador xenérico da súa competencia e capacidade de consolidación, e distribuirase por anualidades de acordo cos seguintes módulos:

1. Módulo estrutural anual: composto dun fixo dunha contía máxima de 55.000 €

2. Módulo variable anual, acumulable ao anterior, en función dos ingresos anuais medios do grupo no período comprendido desde o 1 de xaneiro de 2023 e o 31 de decembro de 2025, segundo os seguintes tramos:

— Ingresos medios superiores a 150.000 € ata 300.000 €: ata 20.000 € anuais.

— Ingresos medios superiores a 300.000 ata 400.000 €: ata 30.000 € anuais.

— Ingresos medios superiores a 400.000 €: ata 50.000 € anuais.

4. Documentación complementaria

Ademais da documentación sinalada nas bases da convocatoria, deberase achegar a seguinte documentación:

1. Certificado emitido pola entidade solicitante á que pertence o grupo (ou estea adscrito no caso das universidades), que acredite o cumprimento dos requisitos establecidos neste anexo.

2. Certificado asinado pola persoa representante legal da entidade solicitante de que se conta con toda a documentación exixida na lexislación para a investigación con animais, de ser o caso.

3. Certificado da composición do grupo na data de publicación desta convocatoria emitido pola entidade solicitante, indicando o código e/ou denominación do grupo. A composición certificada



será a completa do grupo na data de publicación desta orde de convocatoria e deberá incluír, a data de inscrición no rexistro da entidade e todas as altas e baixas que se produciron no grupo no período de 1 de xaneiro de 2023 e o 31 de decembro de 2025. Nesta certificación e para os grupos do SUG farase constar, de xeito específico, os membros do grupo que na data de publicación desta convocatoria pertencen a centros de investigación con acreditación de excelencia, centros colaborativos, campus de especialización acreditados e, subsidiariamente a campus periféricos e, no caso de entidades alleas ao SUG, o persoal investigador de centros periféricos da entidade solicitante localizados nas provincias de Lugo ou Ourense, así como na comarca de Ferrolterra.

4. Certificado de ingresos de I+D competitivos do grupo, computados de acordo co sinalado nos artigos 2 e 4 da convocatoria, obtidos polo grupo de investigación, onde debe figurar tanto o importe total dos proxectos como o desagregado das anualidades que se certifican.

5. No seu caso, certificado conforme ao establecido no artigo 4.2.c) da presente orde da relación específica dos membros que se incorporaron ao grupo entre o 31 de decembro de 2025 e a data de publicación da convocatoria.

6. No seu caso, e para os grupos das universidades públicos do SUG, certificado conforme ao establecido no anexo IV, apartado E, para o cómputo da puntuación outorgada pola participación nun grupo de persoal investigador que figure adscrito a un Centro de investigación do SUG con acreditación de excelencia ou a un Centro de investigación do SUG co recoñecemento de Centro Colaborativo.

7. No caso de fusión ou absorción de grupos, certificado conforme ao establecido no artigo 4.2.e), que acredite a desaparición dos grupos implicados, contaran ou non con esta axuda activa no 2025, e a data na que se produce a mesma, así como unha relación dos membros que se integren no novo grupo.

8. Memoria descritiva da estratexia de investigación, estruturación e consolidación que vai seguir o grupo e que xustifica a necesidade desta axuda. O formato obrigatorio desta memoria está no enderezo web <http://www.edu.xunta.gal> e <http://gain.xunta.gal> e deberá ir asinada polo coordinador ou coordinadora do grupo de investigación.

9. No caso de grupos que contaran con esta axuda activa no 2025 e desaparezan para integrarse nun novo grupo creado por fusión ou absorción doutros, Memoria descritiva da súa traxectoria durante o período no que contou coa axuda e ata a data da súa desaparición.



Aqueles grupos das universidades públicas do SUG que gozaron da axuda de grupos de referencia competitiva nas convocatorias dos anos 2014 e 2018 e nas avaliacións finais de ámbalas dúas foron cualificados cunha A: "O grupo desenvolveu a estratexia proposta e acadou os obxectivos de consolidación previstos" polos dous membros avaliadores, accederán directamente ás axudas establecidas nesta convocatoria para a modalidade A, grupos de referencia competitiva, sen necesidade de avaliación previa da Memoria presentada, quedando suxeitos igualmente á avaliación final ao remate do período da axuda. Aos efectos da avaliación final terán que presentar a documentación necesaria para a súa realización así como a información relativa ao apartado C) do Anexo IV e dos indicadores polos que preferentemente desexa ser avaliado na fase final.

5. Control

Ao remate da axuda realizarase unha avaliación final baseada na evolución experimentada polo grupo no período de referencia.

Nesta avaliación teranse en conta, entre outros criterios, os indicadores establecidos no modelo da memoria descriptiva da solicitude.

De non superar esta avaliación, aplicarase o establecido no artigo 17 desta orde. Aqueles grupos que non obteñan unha cualificación final favorable non poderán presentar solicitude de axudas deste programa, en ningunha das súas modalidades, durante un período de dous anos.

ANEXO II

Modalidade B. Grupos con potencial de crecemento (GPC)

1. Obxecto da axuda

Axudas para a consolidación de grupos de investigación das entidades solicitantes que pola súa produción científica e a súa actividade de I+D amosan potencial de crecemento ata converterse en grupos de referencia do Sistema galego de I+D+i.

2. Requisitos

Ser un grupo de investigación recoñecido pola entidade solicitante que cumpra os criterios seguintes:



a) O grupo de investigación deberá estar integrado, durante toda a vixencia da axuda, polo menos por tres (3) investigadores/as e, no caso das universidades públicas do SUG, deberá constar inscrito como tal nos rexistros da súa entidade antes do 30 de xuño de 2025.

Excepcionalmente, para o caso de grupos novos que se creen por fusión ou absorción doutros grupos que contaran con esta axuda activa no ano 2025 o novo grupo deberá constar inscrito como tal nos rexistros da súa entidade antes do 31 de decembro de 2025.

Na avaliación dos grupos novos resultantes dunha fusión ou absorción doutros grupos terase en conta a coherencia do novo grupo en canto ás liñas de investigación, traxectoria de colaboracións entre os membros, publicacións conxuntas, ou calquera outra circunstancia que xustifique a fusión ou absorción en termos de mellora da excelencia científica do novo grupo creado.

Na avaliación dos grupos novos resultantes dunha fusión ou absorción doutros grupos que contaran con esta axuda activa no ano 2025, e desapareceran como consecuencia desa fusión ou absorción, terase en conta a Memoria presentada polos grupos integrantes, conforme ao indicado no punto 4.9 deste anexo, para a valoración da súa traxectoria ata a data que figure no certificado da entidade acreditativo da súa desaparición como grupo.

Cando se produza calquera variación que afecte á composición mínima do grupo, ou á persoa que exerce a función de coordinador/a, deberá ser notificada no prazo máximo dun mes.

b) Cumprir, como mínimo, catro dos seguintes requisitos de actividade no período do 1 de xaneiro de 2023 ao 31 de decembro de 2025:

b.1) Ter ingresos do grupo medios anuais por actividades de I+D: superiores a 80.000 € (ou superior a 40.000 € cando se trate de grupos das ramas de coñecemento de Artes e Humanidades ou Ciencias Sociais e Xurídicas).

b.2) Proxectos competitivos activos no período: polo menos dous (2) proxectos de importe superior a 15.000 € cada un ou polo menos un (1) proxecto de importe superior a 50.000 €. Deberá indicarse de xeito específico a cota de participación do grupo no proxecto e que este está directamente relacionado coa actividade investigadora do grupo. A estes efectos computarase como proxecto activo aquel que teña ingresos no período comprendido entre o 1 de xaneiro de 2023 e o 31 de decembro de 2025.



b.3) Contratos ou convenios con empresas ou institucións: polo menos dous (2) contratos ou convenios, de importe superior a 15.000 € cada un.

b.4) Artigos en publicacións incluídas en SCOPUS ou *Web of Science*: polo menos tres (3) publicacións. No caso dos grupos das ramas de coñecemento de Artes e Humanidades e Ciencias Sociais e Xurídicas consideraranse artigos en publicacións Dialnet, CIRC, ERIH+, LATINDEX e JCR.

b.5) Libros publicados: polo menos dous (2) (só para grupos das ramas de coñecemento de Artes e Humanidades ou Ciencias Sociais e Xurídicas, sempre que sexa autor/a individual ou coautor/a entre un máximo de tres (3) autores/as).

b.6) Teses dirixidas/codirixidas e lidas: polo menos dúas (2) teses para os grupos do SUG e polo menos unha (1) para o resto de entidades alleas ao SUG.

b.7) Patentes en explotación nas que a entidade solicitante sexa titular: polo menos unha (1) patente (ou dous (2) rexistros de propiedade intelectual de *software* ou dous (2) rexistros de variedades vexetais).

b.8) Empresas creadas a partir de resultados de investigación do grupo: polo menos unha (1) empresa. Poderán ser empresas creadas antes do 1 de xaneiro de 2023, sempre que teñan actividade probada desde esa data ata o momento da solicitude.

b.9) Participación, como socio/a ou líder, en proxectos de programa marco da UE: polo menos unha (1) participación.

b.10) Ter sido beneficiario das axudas a grupos de referencia competitiva da convocatoria do ano 2022 ou grupos con potencial de crecemento na convocatoria do ano 2023 do Programa de consolidación e estruturación de unidades de investigación competitivas.

3. Contía e duración

As axudas terán unha duración máxima de tres (3) anos. O importe total de cada unha das axudas virá determinado por unha contía estrutural máis outra variable que distribuiranse por anualidades de acordo cos seguintes módulos:

1. Módulo estrutural anual: composto dun fixo dunha contía máxima de 31.500 € en cada anualidade.



2. Módulo variable anual, acumulable ao anterior, composto dunha contía de ata 10.000 € en cada anualidade, co obxectivo de axustar o orzamento ás posibilidades reais de execución anuais en función do número de solicitudes avaliadas positivamente e dos recursos dispoñibles, para aqueles grupos que xa gozaran dunha axuda nesta modalidade desde a convocatoria do 2016 e que non estea activa neste momento e cumpran polo menos dous das seguintes condicións no período comprendido desde o 1 de xaneiro de 2023 e o 31 de decembro de 2025:

- Dispor polo menos de 5 investigadores/as durante todo o período de referencia. Este número deberá manterse durante a nova vixencia da axuda do 1 de xaneiro de 2026 a 31 de decembro de 2028.

- Ter uns ingresos do grupo medios anuais superiores a 80.000 €

- Traxectoria do grupo en transferencia de coñecemento referida a algún dos seguintes indicadores:

a) Ter ingresos xerados por acordos de explotación por terceiros da propiedade industrial ou intelectual de invencións desenvolvidas polo grupo de investigación.

b) Ter ingresos por vendas ou prestación de servizos das EBT creadas a partir dos resultados de investigación do grupo.

c) Participación en proxectos de I+D+i colaborativos con empresas de convocatorias competitivas. Os proxectos de I+D+i colaborativa son aqueles que se desenvolven de maneira conxunta entre organismos de investigación e empresas, mediante a creación de consorcios ou a participación do organismo de investigación como subcontratación.

4. Documentación complementaria

Ademais da documentación sinalada nas bases da convocatoria, deberase achegar a seguinte documentación:

1. Certificado emitido pola entidade solicitante á que pertence o grupo (ou este adscrito no caso das universidades), que acredite o cumprimento dos requisitos establecidos neste anexo.

2. Certificado asinado pola persoa representante legal da entidade solicitante de que se conta con toda a documentación exixida na lexislación para a investigación con animais, de ser o caso.



3. Certificado da composición do grupo na data de publicación da convocatoria, emitido pola entidade solicitante, no que se deberá indicar o código e/ou denominación do grupo así como a categoría de cada un dos seus membros. A composición certificada será a completa do grupo na data de publicación desta orde de convocatoria e deberá incluír a data de inscrición no rexistro da entidade e todas as altas e baixas que se produciron no grupo no período de 1 de xaneiro de 2023 e o 31 de decembro de 2025. Nesta certificación e para os grupos do SUG farase constar, de xeito específico, os membros do grupo que pertencen na data de publicación desta convocatoria a centros de investigación con acreditación de excelencia, centros colaborativos, campus de especialización acreditados e subsidiariamente a campus periféricos e, no caso de entidades alleas ao SUG, o persoal investigador de centros periféricos da entidade solicitante localizados nas provincias de Lugo ou Ourense, así como na comarca de Ferrolterra.

4. No seu caso, certificado conforme ao establecido no artigo 4.2.c) da presente orde, da relación específica dos membros que se incorporaron ao grupo entre o 31 de decembro de 2025 e a data de publicación da convocatoria.

5. No seu caso, e para os grupos das universidades públicos do SUG, certificado conforme ao establecido no anexo IV, apartado E, para o cómputo da puntuación outorgada pola participación nun grupo de persoal investigador que figure adscrito a un Centro de investigación do SUG con acreditación de excelencia ou a un Centro de investigación do SUG co recoñecemento de Centro Colaborativo.

6. No caso de fusión ou absorción de grupos, certificado conforme ao establecido no artigo 4,2.e), que acredite a desaparición dos grupos implicados que contaran, ou non, con esta axuda activa no 2025 e a data na que se produce a mesma, así como unha relación dos membros que se integren no novo grupo.

7. Certificado de ingresos de I+D competitivos obtidos polo grupo de investigación computados de acordo co sinalado nos artigos 2 e 4 da convocatoria, onde debe figurar tanto o importe total dos proxectos como o desagregado das anualidades que se certifican.

8. Memoria descritiva da estratexia de investigación, estruturación e consolidación que vai seguir o grupo e que xustifica a necesidade desta axuda. O formato obrigatorio desta memoria atópase no enderezo web <http://www.edu.xunta.gal> e <http://gain.xunta.gal> e deberá ir asinada polo coordinador ou coordinadora do grupo de investigación.



9. No caso de grupos que contaran con esta axuda activa no 2025 e desaparezan para integrarse nun novo grupo creado por fusión ou absorción doutros, Memoria descritiva da súa traxectoria durante o período no que contou coa axuda e ata a data da súa desaparición.

5. Control

Ao remate da axuda realizarase unha avaliación final baseada na evolución experimentada polo grupo no período de referencia.

Nesta avaliación teranse en conta, entre outros criterios, os indicadores establecidos no modelo da memoria descritiva da solicitude.

De non superar esta avaliación, aplicarase o establecido no artigo 17 desta orde. Aqueles grupos que non obteñan unha cualificación final favorable, non poderán presentar solicitude de axudas deste programa, en ningunha das súas modalidades, durante un período de dous anos.

ANEXO III

Modalidade C. Proxectos de excelencia

1. Obxecto da axuda

Axudas para a realización de proxectos de investigación a investigadores ou investigadoras individuais que, contando cunha traxectoria excelente consolidada ou en formación, teñen que afianzar unha liña de traballo baseada en proxectos de alto impacto, fundamentalmente nos ámbitos nacional e internacional.

Estas axudas adoptarán, segundo as características dos investigadores ou investigadoras, dúas modalidades:

1. Liña de reforzo da traxectoria investigadora consolidada.

2. Liña de reforzo de traxectorias emerxentes.

2. Requisitos



As entidades beneficiarias descritas no artigo 3 da convocatoria poderán, para cada solicitude, presentar como persoas candidatas a aqueles/as investigadores/as que cumpran os seguintes requisitos, segundo as liñas de reforzo ás que opten:

1. Liña de reforzo de traxectoria investigadora consolidada: persoal investigador con vinculación laboral estable nunha universidade do SUG que, tendo recibido unha axuda *Starting Grant* do ERC rematen o disfrute desa axuda no ano 2025 ou contén cunha prórroga do ERC para a súa execución. A axuda unicamente estará vixente sempre e cando a persoa investigadora manteña a dita vinculación estable coa entidade beneficiaria que a presenta como candidata, non podendo transferirse a outro investigador ou investigadora se por calquera causa non se mantivesen estas condicións.

2. Liña de reforzo de traxectorias emerxentes:

Para as solicitudes das universidades públicas do SUG: persoal investigador adscrito aos programas Ramón y Cajal ou Beatriz Galindo da modalidade Sénior que contén coa axuda activa e que toman posesión efectiva da súa praza nesa categoría nalguna das universidades públicas do SUG antes da publicación da convocatoria. Na última anualidade da axuda dos programas indicados a persoa investigadora que lidera o proxecto deberá manter a súa vinculación laboral durante un mínimo de catro (4) meses nese ano.

Para as solicitudes das entidades enumeradas no artigo 3 e alleas ao SUG: persoal investigador adscrito aos programas Ramón y Cajal, Miguel Servet ou Juan Rodés que contén coa axuda activa e que toman posesión efectiva da súa praza nesa categoría antes da publicación da convocatoria ou teñan o compromiso de tomar posesión antes do 25 de setembro de 2026. Na última anualidade da axuda dos programas indicados a persoa investigadora que lidera o proxecto deberá manter a súa vinculación laboral durante un mínimo de catro (4) meses nese ano.

Os proxectos unicamente poderán ter unha duración igual ou inferior ao tempo que lle reste de contrato ao investigador ou investigadora e sempre e cando permaneza no programa Ramón y Cajal, Beatriz Galindo, Miguel Servet ou Juan Rodés e na entidade beneficiaria pola que opte, e non se pode transferir a outro investigador ou investigadora se por calquera causa non se mantivesen estas condicións.

En ambas as liñas, o persoal investigador que lidere estes proxectos non poderá ter sido beneficiario dunha axuda nesta modalidade en anos anteriores e non poderá ter unha axuda activa, como investigador ou investigadora principal, dos programas de grupos de referencia competitiva,



grupos con potencial de crecemento ou do ERC ou ben solicitala ao amparo desta convocatoria; se durante o prazo de vixencia o investigador ou investigadora que lidere un proxecto de excelencia obtivese unha axuda de GRC, GPC ou do ERC, deberá renunciar á axuda concedida ao abeiro desta orde.

En ambas as liñas, a persoa investigadora responsable do proxecto deberá contar cun equipo mínimo de investigación formado por un mínimo de dúas (2) persoas (sen contar o investigador ou investigadora principal) que deberá de cumprir os seguintes requisitos:

a) A persoa investigadora responsable do proxecto e as dúas (2) persoas que formen o equipo mínimo deben prestar servizos na mesma entidade beneficiaria durante a vixencia do proxecto.

b) Só un (1) de todos os/as membros do equipo poderá ter categoría de profesor/a titular de universidade ou de escola universitaria, investigador/a científico de organismos públicos de investigación ou científicos/as titulares de organismos públicos de investigación. Ningún membro do equipo poderá ter categoría de catedrático/a ou profesor/a de investigación de organismos públicos de investigación nin estudante de grao ou mestrado.

c) Para as solicitudes do SUG, poderán computarse como membros do equipo os/as estudantes predoutorais, sempre que exista unha vinculación cunha universidade do SUG mediante contrato ou matrícula. No caso das entidades solicitantes alleas ao SUG, a vinculación será mediante contrato coa entidade solicitante.

Cando se produza calquera variación que afecte á composición mínima do equipo deberá ser notificada no prazo máximo dun mes.

3. Contía e duración

1. No caso dos proxectos que se acollan á liña de traxectoria investigadora consolidada, as axudas serán de aplicación por un período de ata 4 anualidades, mediante o pagamento anual á institución á que pertenza a persoa que lidere o proxecto dunha contía máxima anual de 50.000 €.

2. No caso dos proxectos que se acollan á liña de traxectoria investigadora emerxente, as axudas serán de aplicación por un período máximo de ata 5 anualidades, mediante o pagamento anual á institución á que pertenza a persoa que lidere o proxecto dunha contía máxima anual de 15.000 € para o ano 2026 e de 25.000 € para os anos 2027, 2028, 2029 e 2030.



3. Para que se poidan atender gastos nunha anualidade é necesario que a persoa investigadora que lidera o proxecto manteña a vinculación laboral durante un mínimo de catro (4) meses nese ano.

4. Documentación complementaria

Ademais da documentación sinalada nas bases da convocatoria, deberase achegar a seguinte documentación:

1. Certificado emitido pola entidade solicitante no que se acrediten o cumprimento dos requisitos establecidos neste anexo, indicando a composición do equipo coas categorías contractuais e profesionais de cada un dos/das seus/súas membros.

2. Certificado asinado pola persoa representante legal da entidade solicitante de que se conta con toda a documentación esixida na lexislación para a investigación con animais, de ser o caso.

3. Memoria descritiva do proxecto de investigación. O formato obrigatorio desta memoria está no enderezo web <http://www.edu.xunta.gal> e <http://gain.xunta.gal> e deberá ir asinado polo investigador ou investigadora principal do proxecto.

5. Control

Ao remate da axuda realizarase unha avaliación final do cumprimento do proxecto de investigación financiado. Nesta avaliación terase en conta a coherencia da traxectoria de execución con respecto á memoria presentada, a calidade do traballo realizado e a súa repercusión no ámbito científico. De non superar esta avaliación, aplicarase o establecido no artigo 17 desta orde. Complementariamente, e tamén no caso de non superar esta avaliación, as persoas que teñen a condición de investigador ou investigadora principal do proxecto non poderán formar parte do equipo mínimo de grupos de investigación en convocatorias análogas de consolidación e estruturación de grupos de investigación durante un período de dous anos desde o remate do proxecto.

ANEXO IV

CRITERIOS DE AVALIACIÓN MODALIDADES A e B

Criterios	Puntuación máxima
-----------	-------------------



A) Estrutura/organización de investigación: tamaño do grupo, mecanismos de xestión e organización e infraestruturas. Ata un total de 10 puntos	
Composición, estrutura, interdisciplinariedade e coherencia do grupo e da súa actividade en relación co seu ámbito de coñecemento. Valorarase especialmente a existencia de sinerxías de colaboración entre os membros do grupo en proxectos ou liñas de investigación. No caso de grupos resultantes dunha fusión ou absorción doutros grupos terase en conta a coherencia do novo grupo en canto ás liñas de investigación, traxectoria de colaboracións entre os membros, publicacións conxuntas, ou calquera outra circunstancia que xustifique a fusión ou absorción en termos de mellora da excelencia científica do grupo creado. Ademais, terase en conta a valoración da traxectoria dos grupos integrantes, que contarán con esta axuda activa no 2025 e que desaparecen para formar parte do novo grupo. Esa traxectoria plasmarase na Memoria final presentada, segundo o establecido no punto 4.9 dos anexos I e II, polos grupos que desaparecen.	5
RRI: Investigación e innovación responsable. Valoraranse as accións do grupo en materia de educación científica, igualdade, gobernanza, ética e participación cidadán. No caso concreto da igualdade de xénero se terá en conta o número de investigadoras do grupo con respecto do total, e o seu desempeño en áreas de relevancia e se unha muller exerce a función de liderado na solicitude. Valoraranse positivamente aquelas propostas de grupos liderados por mulleres, integrados en máis do 40 % por investigadoras ou a incorporación da perspectiva de xénero no seu quefacer diario.	5
B) Actividade investigadora (no período 2023-2025): tomando en consideración o tamaño e composición do grupo. Ata un total de 65 puntos	
Teses de doutoramento defendidas no período (con especial relevancia naquelas que teñan mencións ou distincións e as lidas con mención internacional).	3
Contratados/as pre e posdoutorais, procedentes de convocatorias competitivas.	5
Promoción de talento. (Se valorarán os grados de autonomía que se outorga ao persoal investigador en formación, as accións de <i>mentoring</i> da súa actividade. No caso do persoal posdoutoral valoraranse especialmente aquelas posicións que poidan chegar a consolidarse e as accións do grupo que permitan que este persoal mellore a súa competitividade en el sistema de ciencia)	2
Proxectos de convocatorias de ámbito estatal.	6
Proxectos de convocatorias de ámbito internacional.	8
Contratos e convenios con empresas ou institucións.	6
Ingresos por contratos, convenios e convocatorias.	6
Publicacións incluídas en SCOPUS ou <i>Web of Science</i> . Valorarase positivamente o feito de que a autoría corresponda de xeito conxunto a máis dun membro do grupo. Libros e capítulos de libros publicados. Valorarase positivamente o feito de que a autoría corresponda de xeito conxunto a máis dun	20



membro do grupo. Publicacións de actas de congresos internacionais. Resultados de creatividade artística (para grupos de Arquitectura e Belas Artes).	
Participación como editor/a (xefe/a ou asociado/a) en comités editoriais de revistas científicas indexadas en SCOPUS/WoS.	2
Outros criterios, segundo o perfil do grupo: máximo 7 puntos - Ter integrado persoal investigador beneficiario directo dunha axuda do Consello Europeo de Investigación (ERC). Axuda activa no período. - Patentes en explotación (complementariamente rexistros de software e rexistros de variedades vexetais) - Empresas creadas a partir de resultados de investigación do grupo. - Para as solicitudes das ramas de Artes e Humanidades e de Ciencias Sociais e Xurídicas ou de grupos que se consideren de investigación básica, unha puntuación adicional por produción científica de excelencia sempre e cando alcancen os 20 puntos de maneira previa en publicacións.	4 3 3 3
C) Estratexia do grupo de investigación. Ata un total de 20 puntos	
Calidade e viabilidade da proposta de desenvolvemento do grupo. Estratexia de aplicabilidade dos resultados que alega o grupo.	20
D) Fomento pase de GPC a GRC. 3 puntos	
Para aqueles grupos de potencial de crecemento da convocatoria de 2023 que presenten a súa solicitude como grupo de referencia competitiva (sempre e cando non se supere a puntuación máxima de 95 puntos alcanzable cos criterios A, B e C).	3
E) Puntuación dos órganos xestores. Ata un total de 5 puntos	
No caso das universidades públicas do SUG, participación no equipo de investigadores/as adscritos aos Centros de investigación do SUG con acreditación de excelencia (ata un total de 5 puntos) e aos Centros de investigación Colaborativos (ata un total de 2 puntos) previa presentación dun certificado de compromiso de poñer a disposición do centro o equipamento adquirido con cargo a esta axuda durante un tempo mínimo de 10 horas semanais.	0 - 5
No caso das universidades públicas do SUG, participación no equipo de investigadores/as adscritos aos campus de especialización acreditados (Campus Industrial de Ferrol, Campus Terra de Lugo e Campus Auga de Ourense), e subsidiariamente dos campus periféricos de Ferrol, Lugo, Pontevedra e Ourense. Ata un total de 5 puntos.	5
Para o resto de entidades alleas ao SUG participación no equipo de investigadores/as dos centros periféricos das entidades solicitantes localizados nas provincias de Lugo ou Ourense, así como na comarca de Ferrolterra. Ata un total de 2 puntos.	2
PUNTUACIÓN TOTAL MÁXIMA (solicitudes SUG)	100
PUNTUACIÓN TOTAL MÁXIMA (solicitudes alleas ao SUG)	97



ANEXO V
CRITERIOS DE AVALIACIÓN MODALIDADE C

CRITERIOS	PUNTUACIÓN MÁXIMA
A) Calidade científico-técnica do proxecto. Ata un total de 35 puntos	
Relevancia e novidade científica dos obxectivos en relación ao estado de coñecemento da área; viabilidade das hipóteses, adecuación da metodoloxía e técnicas instrumentais.	35
B) Viabilidade do proxecto. Ata un total de 20 puntos	
Deseño e plan de traballo da investigación; adecuación dos recursos humanos e materiais ao plan de traballo.	20
C) Capacidades científico-técnicas do equipo de investigación para a realización do proxecto e impacto esperado. Ata un total de 35 puntos.	
c.1) Capacidade formativa: entendida como aquelas accións que o equipo de traballo realizará no contexto do proxecto para a formación e mellora do persoal investigador que participe nel.	10
c.2) Capacidade de captación de recursos: entendida como a posibilidade de que o equipo de traballo que se configura poda obter financiamento (competitivo ou non) que complementa a liña de traballo que se inicia.	10
c.3) Producción científica: entendida como a previsión de publicacións e outros items relacionados cos resultados que se deriven do proxecto.	10
c.4) Aplicabilidade e transferencia da proposta: na que se definan as posibilidades e modo nos que os resultados do proxecto podan aplicarse ou transferirse.	5
D) RRI. Investigación e innovación responsable. Ata un total de 10 puntos	
d.1) Liderado feminino:	2
d.2) Participación de mulleres no equipo	2
d.3) Outros elementos de Investigación e innovación responsable: educación científica, ética, e participación cidadán	6
PUNTUACIÓN TOTAL MÁXIMA	100

